



MOHAMAD HASAN beramah mesra dengan sebahagian pelajar sambil diperhatikan **Abdul Shukor Husin** (dua dari kanan) pada **Majlis Minum Petang Bersama Pengurusan Tertinggi USIM** di Seremban, Negeri Sembilan, kelmarin. - **UTUSAN/ABD. RAZAK AID**

Ilmuwan sebagai penyelesaian masalah

SEREMBAN 5 Nov. - Idea dan pandangan kritis ilmuwan di institusi pengajian tinggi (IPT) dalam sesuatu isu perlu bersifat penyelesaian masalah agar dapat dimanfaatkan secara bersama menerusi mekanisme yang dibentuk.

Menteri Besar, Datuk Seri Mohamad Hasan menjelaskan, apa yang berlaku ketika ini adalah wujud segelintir mahasiswa yang seringkali dilihat hanya tahu bercakap tetapi langsung tidak memberikan manfaat kepada umum.

"Jangan kita fikir menjadi golongan ilmuwan ini seolah-olah kita berada di awang-awangan. Turun, bercampur dan bergelumanglah dengan masyarakat setempat dan bawa balik masalah yang dihadapi mereka untuk dikaji jalan penyelesaian kepada kita (kerajaan)," katanya.

Beliau berkata demikian ketika berucap dalam majlis Ramah Mesra Bersama Pengurusan dan Pelajar Universiti Sains Islam Malaysia (USIM) di sini semalam.

Yang turut hadir, Pengerusi

Lembaga Pengarah USIM, Prof. Emeritus Tan Sri Dr. Abdul Shukor Husin; Naib Canselor USIM, Prof. Datuk Dr. Musa Ahmad; Setiausaha Kerajaan Negeri, Datuk Mat Ali Hassan serta Timbalan Naib Canselor dan Hal Ehwal Pelajar, Prof. Datuk Dr. Mohamed Asin Dollah.

Dalam ucapannya, Mohamad turut menyeru agar mahasiswa USIM membuang stigma rasa rendah diri dengan menganggap IPT awam aliran agama berada dalam kelompok atau kelas berlainan.